

# KLAUS IRMSCHER

S Ä N G E R | S O N G S C H R E I B E R

## BLUSS DR BLUES

Klaus Irmischer 12/1997 & 12/2000

1.

Morchns um dreie – an dr Theke im Pub  
's Guinness schmeckt dr ni mehr  
De iebrlechst – seilste dich ab?  
Itze biste doch extra hier her  
In dä eenzche vrnimftche Gneipe  
Und mit kennr Frau war was luus  
Do bleibt dr bluß dr Blues

2.

Do setzt sich ne Frau zä dir hin – nu su ä Glick!  
Nu, und die is ooch alleene  
Spannende Lippm – ä zielstreb'chr Blick  
Blondlockche Haare, schwarzstrumpfche Beene  
Sä arzählt und arzählt und drickt 's Been an dich nan  
Und dä Wimbrn glimbrn ganz gruß  
Nu, glei is er fort – dr Blues

3.

Nase an Nase – nu, do gieht's ja richtch rund!  
Glei habt'r eure Zung'n vrfitzt  
Rudwein und Guinness –  
nu, das gibt ne Mischung im Mund!  
Und drmit's aa su richtch funkt und blitzt  
Do trinkt'r noch'n Schnaps fr's Zindgasgemisch  
'n Zindfunkn liefert dr Strom  
Von'n Amalgam-Blombm in deinr Gusche  
Zä dar ihr'n Gold-Palladchum-Kron'n  
Und dr Strom von dar ihrer Hand off dei'm Gnie  
Dar gnallt dir bis nundr in'n Fuß  
„Harzlichn Glickwusch!“ saacht bluß dr Blues

4.

„Dr Glemprn mäht rum mi'm Abflußrohr“  
Arzählt sä zum dreizähntn Mal  
Dä Stimme glapprt dir achteckch im Ohr  
Dr Blick bohrt wie Warkzeichstahl  
Dr Mann is fort seit een Monat  
's nächste Mal will sä zum Anwalt gehn  
Und de markst, dar ihr Been fühlt s'ch fremd an  
Durch ihrn Strump und dei Husnbeen  
Und ännr dippt dir off dä Schuldr  
Das gieht durch bis nundr in' Fuß  
„Glick auf, mei Gudsdr – 'n scheen' Gruß vom Blues“

5.

Scheene schwarzstrumpfche Beene  
Morchns um viere im Babb  
Dä Stimme glingt bluß ä biddl gemeene  
Abr, undrm Pulli do zeichnet sich was ab!  
Dä Abflußrohr-Story hält sä mundr  
Dr Wirt hält schu dä Diere off  
Nu, zä ihr sinn 's vier Minutn 'n Barch nundr  
Und zä dir heeme isses ne Viertelstunde 'n Barch noff  
Und hintr dir lacht ännr drackch:  
„Nu, schaffst'n das noch zä Fuß???”  
Viel Spaß, Alter, mir sähn uns morchn frieh wiedr  
Nu, 'ch bin doch dei Gumbi – dr Blues!“  
!Ähhh!! Das war bluß – dr Blues